

## **Basef Ifimba Pol Nanda'ef Fagafe'ma Esis Kolosi**

### **Basef bandafi Pol nanda'ef fagafe'ma esis Kolosii**

1:1-14 Pol nanifela Goda esis ea' nandabetena nogowa' banagas

1:15-2:19 Krais atona banagonai nepe nagali'i ma hiahaom hiami maloma epes hiasi hi' alas.  
Na'amba dei' anen atona nepe nagali'ma esis Kristen sios hiasii.

2:20-4:6 Apa' maga' maloma Krais ea' mosafel malomana dei' monda' waf bu'wafi hilili'i

4:7-18 Pol na'ipasa basef akutaifi ea' nanda'  
basef dagalaifi fafe'ma esis

<sup>1</sup> Ae' Pol, okom Godi atom nandandepe aposel anda' maol Krais Jisasi. Ae' aloma owame ae'anai Timoti wape na'a'e.\*

<sup>2</sup> Ea' anda'mepago basef ifimba fafe'mago ipa' amam nematawa Godi pegape wambel Kolosii, ipa' alipipai pagape sisihipama Kraisi. Afa' bi-afa wa'i God ahamapa ape'inai notopalopepa dowaf nowa' banagaepa nondal opalef ipe'ilifi fepe sa'ombel.\*

### *God nawalapa hapifesis Kolosii*

<sup>3</sup> Nema' mamahefa afa' wandabetena ipa', don-dol afa' wanifela God anen Dembinai ape'inai Jisas Krais Ahamana. Afa' wanifelona ma pagahapifa Krais andeande'.

---

\* <sup>1:1</sup> Ro 1:7; Ef 1:1    \* <sup>1:2</sup> Ef 1:15,16

**4** Dei' main, afa' wame' basef ea' ma ipa' na'amba. Ipa' pahapifa Krais Jisas ea' ukup ipe'ipi paipaila amam nematawa Godi hiasi hi'agalas.\*

**5** Fowa' basef bu'wafi Godi ifimba endilisifi fatagamepa tame'efa hiahaom bu'wami ipe'imi dei' ma'oh magassasaepa heveni pape pegehafami. Hiahaom amamba bu'wami kofagema ma hapif ipe'ini naloma waf afamba ipe'ifi ukup pagapagailasafi.

**6** Ama ganimba itap hiagoma basef bu'wami amamba mawalapai waf bu'wafi ma epes hiasi mataga lu'um atapim mikila' fowa'. Basef amamba manda'as na'amba atin si'i dambadamba mali' matagama ipa' pagame'am. Nemaaf afamba ipa' pali' pegawa endilisi okom Godi nagatopalopepa dowafi, basef amamba mawalapai waf bu'wafi afamba fataga lu'ufa ipa'.

**7** Ipa' pelafa basef amamba bu'wami, Epafras nagawalipipami a' pegawam. Anen epen bu'unai afa' ukup pagapagailanai nanda' maola Kraisi nalomafa wandao'oma wanda' maol atitini. Anen naha'ofafa nogatopalopa ipa' ea' numafi maol Kraisi andeande' datima.

**8** Anen na'ipafa basef ifimba ma Ambal bu'unai Godi nanda'epa ukup pagapagaila amam nematawa Godi hiasi.\*

*Pol nandabetena God nogowa' banaga esis  
Kolosi*

**9** Epafras na'ipafa Ambal bu'unai Godi nanda' maol inimba bu'wani ma opalef ipe'ilifi. Ea' afa' biafa wapani wame' basef ifimba. Nemaaf fagali'i

---

\* **1:4** Ef 1:13,15-16; 1 Pi 1:4; Ro 1:13; 1 Ti 3:16; Kl 4:12; Fm 23 \* **1:8**  
Ef 1:9,16,17; Fl 1:9

wame'ef, afamba atef wasafela beten wanda'ana ipa' wafi'i wafi'i wataga dei'. Afa' ina wak-wahipa, owa'. Wandabetena God notopalopepa nonda'epa pegape si'ipa ma gawa ananini endilisi. Gawa inimba Ambal bu'unai ananinai na-gase'epani.\*

<sup>10</sup> Wanda'as na'amba ma atiasi ipa' la'ifipama fe' poe ipe'ini negataga bo'wen endilisi dondo'ma waf Dembinaii. Wanda'mepa betena Anen negati waf ipe'ifi fenda' okom ananimi bo'oma ipa' nondagalaepa. Ama penda' maol naninani hiani bu'wani hi'igalana pegegawana andeande' pigikila' fowa' pali' pegegawana.\*

<sup>11</sup> Afa' wanda'mepa beten wapani na'amba. Wa'i God nowa' banagaepa ma banagami ananimi fasimi mogogala' a'owa'i. Ama ipa' atiasi pigal-lutu banagepama pegefa' nimanimi mamahoma mogatagamepai ma sonogahepa ea' opalef ipe'ilifi ina fesafel a'owa', fepe sa'ombel.\*

<sup>12</sup> Ea' ondabetena ipa' ma piganifela Ahamapa. Anen nanda'epa la'ifipa ma pegefa' hiahaom amamba fasimi anen nagandondombama ipe'i. Amamba anaf pefa'am peloma esis amam nematawa ananisi hiasi anamba anen nagala'ambemagon nogogala'ma.\*

<sup>13</sup> Anen natagwahepa ea' ma banagami awami magape owamb akoti ea' nahaponapa mafe' mawis nomona maol Nogamanai nope Dembinai nugumafiapa. Nogamana anamba anen okom maga'iana a'owa'i.\*

\* **1:9** Fl 1:27; Ef 2:10

\* **1:10** Ef 1:19, 3:16

\* **1:11** Ef 1:11,18

\* **1:12** Lu 22:53; Ef 2:2

\* **1:13** Ef 1:6,7

**14** Nogamana ananinai atona natagwahepa ma banagami amamba ma dei' makwaha waf awafi apa' manda'afi magape wahifipa.\*

### *Wafi maol Kraisi*

**15** Krais anen ea' na'amba atin endilisi si'i God anamba apa' owa' mogatolonaia. Anen balaga endilisi naomb nagali'ma hiahaom hiami God nanda'ami magape ilif itapi hi'alam maloma hiahaom ambagof fagapaumi maloma epes hiasi hi'alas.\*

**16** God nanda' hiahawes isimba hiasi hi'alas sagape ilif itapi sataga sape lagol nogamanai atogol. Anen atona nanda' amom banagami hiami mape magali'i magape la'afena itapi otagai a agufumi dembami maloma amom dembami enseli maloma amom dembami banagami mugumafi ambagufi. Anen nanda' hiahaom amamba maloma epes hiasi dei' apa' magatolomi maloma hiahaom amamba apa' owa' mogatolom naepia. God nanda' hiahaom hiami mataga mape ma lagol nogamanai atogol ea' hiahaom amamba maloma epes hiasi ananimi atom.\*

**17** Anen nepe nali'ma hiahaom amamba hiami ea' hiahaom amamba mataga banagami ananimi atom nahapilam banagem mape atapim.\*

**18** Anen Dembinai nepe nali'ma esis sios amam nematawa Godi ea' si'i alop si'ip ananipi. Anen atona kofagonama sios sagape namis atapis. Anen nali' dambadamba nogosafel wandofi. Ea'

\* **1:14** 2 Ko 4:4; Jo 1:18    \* **1:15** Jo 1:3,10    \* **1:16** Jo 1:1, 8:58

\* **1:17** Ef 1:22-23; Ap 26:23; Re 1:5

dei' anen atona nepe nali'ma hiahaom amamba  
hiami numafiam.\*

<sup>19</sup> Dei' main, okom Godi na'i waf faloma gawai  
banagami ananimi hi'alam mape nogamana  
atona. Dei' naso'ana amamba hi'alam anen  
mapomana atapim.\*

<sup>20</sup> God nanda' hiahaom amamba hiami magape  
ilif itapi hi'alam maloma epes hiasi hi' alas wapani  
sataga be'es sapoma anen. God nanda'as na'amba  
ma esimbel Kraisi atembel balo nemaf afamba  
nagaga' lawag usi'igai ti'wanaegai.\*

<sup>21</sup> Fowa' ipa' wapani ata' pape laogona God  
pewa' alafugahana. Ukup ipe'ipi ata' pefalana  
bounai ma panda' waf awafi.\*

<sup>22</sup> Apa' Krais nataga epen nofa' alop epesi sa-  
hana naga', amamba atom God nanda'epa pataga  
alipipai opaf atof palomana ma ga' Nogamanai  
atin. Nanda'as na'amba ma nofa'epa pifi'mai  
anen pegape be'epa hilili', kofagema akepa ma  
naep ananipi.\*

<sup>23</sup> Apa' ipa' pindahapifa basef bu'wafi Godi  
tatala'if atapipa ma pigalutu banagepa endilisi  
si'i olaf fagali'i fogowa' banaga ipati. Na'amba  
ukup pese'epama pegegawa endilisi anaf pegefa'  
hiahaom amamba fasimi basef bu'wafi faga'iami.  
Basef ifimba pagame'ef ea'i sawalipasafa epes hi-  
asi sagape itapi hi' alas. Basef ifimba ae' Pol ataga  
aman anda' maola agawalipasafi.\*

\* **1:18** Jo 1:16; Kl 2:9      \* **1:19** Ef 1:10, 2:16; Ro 5:1; Ef 1:7, 2:13; 1  
Jo 2:2      \* **1:20** Ro 5:10; Ef 2:12, 4:18      \* **1:21** Ef 2:14-16; Ef 5:27

\* **1:22** Ef 3:17; Hi 3:14; Mk 16:15; 1 Ti 3:16      \* **1:23** Ef 3:13

*Pol natopalopa esis Kolosi*

<sup>24</sup> Dei' ae' andagala ma efa' akafimi egatopalopa ipa' Kristen amam nematawa sios Kraisi, ipa' si'i alop si'ip ananipi. Anom akafimi apa' manda' maol Kraisi mogofa'ami, amamba ata' mape at-apim. Dei' a'i imbifa amamba agame'am alop ae'api anda' maol Kraisi. Ae' a'i ewapanimana akafimi amamba ma anda' maol Kraisi.\*

<sup>25</sup> Ae' ataga aman anda' maol agatopalopa sios amam nematawa Godi na'amba. God nandan-depe dei' ataga aman anda' maol aga'ipipa basef hiafi ananifi hi'agalafi.\*

<sup>26</sup> Fowa' nimaguf hiafi basef ifimba fape fandambaho'ma ukup esis misi'ah amam nematawa hiasii. Apa' dei' afataga fandawalap alihifa ukup esis amam nematawa Godi.\*

<sup>27</sup> Okom ananimi magape na'amba. Anen na'i nihimba'mapa basef ifimba fasif a'owa' agol lu'wagilifi, fandawalap fatopalopa esis amam nematawa hiasi hi'agalas. Basef ifimba na'amba. Krais nepe opalef ipe'ilifi nomona dei' pape pege-hafa anaf pefa' mogogala'i ananimi pegalomana.\*

<sup>28</sup> Ea' afa' wawalapa basefa Krais wawalipasef epes hiasi hi'alasa wasindi'amonasa gawa hiani naninani bu'wani. Afa' wa'i umbehagumai epes hiasi atona atin hi'ilas sogafe'ma Kraisa sogape epes ananisi endilisi sogape sisihisa anen.\*

<sup>29</sup> Ea' dei' maol ae'ani anda'an numa'win a'owa' ma banagami hiami Kraisi manda' maol banagambel atapim nomon opaf ae'afii.

---

\* **1:24** Ef 3:2,7-8    \* **1:25** Ro 16:25-26; Ef 3:3-5,9-10    \* **1:26** Ef 1:18; 1 Ti 1:1    \* **1:27** Ef 4:13    \* **1:28** Ef 3:7,20; Fl 4:13

**2**

*Esis a' sondahapifa Krais banagesa sogahagasa basef baso'afi*

<sup>1</sup> Ae' a'i ipa' pegawa na'amba. Ae' anda' numa'umi a'owa' ma atopalopepa paloma Lao-disia saloma epes isimba hiasi ata' owa' sigati amaga ae'agaia.\*

<sup>2</sup> Ae' anda'am ahifima opalef ipe'ilifi fegataga banagalef pegape ukup pindaima atina sahin owan ipe'isi. Ama ipa' pegefa' gawa fasini endilisi negewa' banaga hapif ipe'ini ma pegegawa basef Godi endilisifi atif. Ae' anda' maol inimba ma ipa' pegegawa basef ifimba Godi kofagefa fowa' fandambahi'i fa'i Krais atona.\*

<sup>3</sup> Anen atona nanda' gawa bu'wani naloma nomonas fasisi Godi hiasi hi' alas mataga mandawalap alihim. Amamba fowa' mali' mape mandambaho' si'i epes sambe'am ma'oh mandambahi'i sagatalom otamba hiambai, dei' mandawalap alihima lagol Kraisi atogol.\*

<sup>4</sup> Ae' a'ipipa basef ifimba. Ipa' solawaipa andeande'. Na'amba anin epen nembaso'mepa ma basef kikipaifi usiusihifi.\*

<sup>5</sup> Endilisi ae' dei' ina ape alomepa, apa' nomonas ae'asi a si'i ape agalomepa andagalama sati ipa' pagalutu banagepa ma pagahapifa Krais ande-ande'.

*Apa' sisihipa dog maloma Krais mofa' ambal namili*

---

\* **2:1** Ef 3:4,18; Kl 1:26      \* **2:2** Ais 45:3; 1 Ko 1:24,30; Ef 3:19      \* **2:3**  
Ro 16:18; Ef 5:6; Kl 2:8      \* **2:4** 1 Ko 5:3

**6** Ipa' pahapifa Krais Jisas ea' pa'i anen Dembinai ipe'inai. Na'amba dei' a' pefe' pendape sisihipama anen.\*

**7** Ipa' pindalutu banagepama anen si'i lawag gogotawa banagoga itap ea' si'i ipat tagatoma ilifa olaf banagafi. Ipa' pindahapifif banagepa basef amamba bu'wami pegelafami pikila' fowa' pali' pagahapifam ea' pindanifela God dondol.\*

**8** Ipa' solawaipa andeande'. Na'amba anin epen a' nese'epa basef wafifi a basef gawaifi epes saga'iefi nembaso'mepa nehekelepa ma basef ifimba si'i sola mafis sogafe'ma isalef. Basef ifimba ina fataga Krais, owa'. Ifimba bafasapa ihasapa ape'isi saga'ipapafi fataga waf itapafi atef.\*

**9** Ipa' solawaipa andeande'. Dei' main, ipa' apegawa waf Godi faloma gawai banagami ananimihiami hi'alam mape Krais atona atapim, fowa' gani nafi'i nafi'i nataga afamba nagape itap apa'e mopaona atapim.\*

**10** God nase'epa ambal namili endilisili lapaipa pape sisihipama Krais. Anen dembinai nepe nagali'ma ambagof hiami banagami maloma ensel dembami magape la'afena itapi otaga hi'alam.\*

**11** Ipa' pandaloma dog palomana. A pape sisihipama anen, pape si'i panda' waf afamba amom Juda magatopa'mama alopafi. Afamba ina waf epes sanda'afa alop atop dowadowaf wafifi, owa'. Krais atona nanda'mepaf natofa waf apifi ma

---

\* **2:6** Ef 3:17; Ef 2:20-22    \* **2:7** Kl 2:3    \* **2:8** Jo 1:14,16    \* **2:9**  
Ef 1:21-22    \* **2:10** Ro 2:29

nembel apinai.\*

<sup>12</sup> Ipa' pefa' sa'of ea' pandaloma paloma Krais sawepa palomana. Ipa' pahapifa banagami Godi nagasa'ma Krais matmati, isimba atis dei' anen nasa'mipai wapani paloma Krais.\*

<sup>13</sup> Fowa' ipa' paga' ea'. Dei' main, ipa' panda' waf naninani aunai ea' ipa' owa' Judaipaia pege-lalama mu'uli God nagaso' Mosesani. Apa' dei' God nanda'epa pataga namipa paloma Krais ea' makwahomapa waf awafi apa' manda'afi hiafi hi'alaf.\*

<sup>14</sup> Basef ifimba ma mu'uli God nagaso' Mosesani fagail buki fa'i akafimi apa' mogofa'ama waf ape'ifi faloma anif basef ahififa mogailafi, basef amamba hiami God a' nali'amonam si'i nandolam magail lawag usi'igai ti'wanaegai nalamonam hi'alam.\*

<sup>15</sup> Lawag agamba anen natalogofa ambagof awami banagami maloma agufumi amamumi dembami magape la'afena itapi otagai mape lafela anen a' owa' banagema. Anen nikila'am ea' nowa'am sisihim nafe' nali'am nafe' amom mafe' magi'mana ea' epes hiasi sakola naep satolom sa'i epes falafumi.\*

### *Apa' maga' maloma Krais ea'*

<sup>16</sup> Na'amba dei' ipa' ina pi'i aho'ma anona aman nosapaga ipa' ni'ipipa anin mu'uli ma waf saga' gwa'aisi embelafi ma anef nemaf lu'wafi sanda' lotuwafi a'a sonda' anis gwa'aisi ma awin

---

\* **2:11** Ro 6:4; Ef 1:19-20; Kl 3:1      \* **2:12** Ef 2:1,4-5      \* **2:13** Ef 2:14-16; 1 Pi 2:24      \* **2:14** Kl 1:13      \* **2:15** Ro 14:1-12

dambaini negataga a'a nemaf Sabat sagapoma noma'wafi, owa'i.\*

**17** Hiahaom amamba fowa' esis sagailami mondola'waifa hiahaom anaf migi' mogatagai, amamba dei' mataga ea'. Apa' hiahaom endilisimi atom, amamba Krais atona.

**18** I'i epen mamahina nepe ninifa koh dahembe' ananini ma hiahawes anen nagatilisi a'a nembaso'mas ni'i anin sa'umbelini nagape lafela anis daiasi a'a nenda' lotu ma amom ensel, ipa' ina pi'l aho'ma epen inimba nepa'agaipa ma pegefa' hiahaom fasimi ipe'imi magasasa ipa' ilifi, owa'i. Epes na'ambaisi sasa'ma agof asasigufi lu'wagofa hiahawes sa'oh sandondo'ah sagatilisi ea' ukup papoma esis atis saila waf afamba itapafi.\*

**19** Esis ina sahapila Krais sisihina anen nape nagali' endilisima ma ape'i, owa'. Anen balaga numafi gwa'aisi nalaga alop si'ip ea' nanda' gigisilimb mais so'matagw sandahapima atin alop si'ip. Ea' dei' God nanda' alop pataga lu'up banagep.\*

**20** Ipa' paga' ea' paloma Krais ma pagakwaha waf awafi hiafi wafifi itapafi. Dei' maina ipa' ata' pailaf pagafe' si'i ipa' epes itapipai? Dei' maina ipa' ata' pagafe' lafela mu'uli na'ambaini? Hapaimi.

**21** Mu'uli inimba naga'i na'amba na'i, "Ina' owa'i nihapilan, nea'an, newa'an nepe lagofa, hapaini."\*

**22** Mu'uli inimba na'i hiahawes embel gwa'aisi mais apa' maga'asi. Hiahawes isimba apa' ma'as

\* **2:16** Hi 8:5, 10:1   \* **2:18** Ef 2:21; Ef 4:15-16   \* **2:19** Ga 4:3-5,9;

1 Ti 4:3   \* **2:21** Ais 29:13; Mt 15:9

ea' higilalas. Dei' main, mu'uli inimba epes atis ukup pandanda'man sawalapan sawalipa anis.

<sup>23</sup> Endilisi, mu'uli inimba nataga si'i mu'uli gawa bu'wani nagapaini ea' na'ipapa nasa'mapa na'ipapa banagambel monda' lotu ma amom ensel a moha alop ape'ipi. Apa' owa', mu'uli inimba ina banagena netopalopapa mogatofa waf awafi alopai ma nembel apinai, owa'atin.

### 3

#### *God nasa'ma apa' ea' maloma Krais*

<sup>1</sup> God nasa'ma ipa' ea' pape sisihipama Krais. Isimba atis ipa' ukup pendapoma hiahawes sagape otaga ilifi, anamba Krais nepe agilinai felefele'ma lagol kwahisigili Godi.\*

<sup>2</sup> Ipa' ukup pendanda'ma hiahawes sagape ilifi atapipa. Hiahawes sagape itapi owa', hapaisi.\*

<sup>3</sup> Dei' main, ipa' paga' ea'. Ipa' pape sisihipama God, dei' ambal namili ipe'ili lape landabaho' si'i Krais dei' nepe nandambaho'.\*

<sup>4</sup> Krais kofagonama ambal namili ape'ilii anaf notaga nondawalap alihigima, ea' ipa' wapani petaga pefa' mogogala'i ananimi pelomana.\*

#### *Apa' mataga epes dambaipai ea'*

<sup>5</sup> Ipa' pendaha waf anamba awasinai hianai itapanai nelelemb apimi noga', waf anamba na'amba. Waf so'a waualafi a waf alugufi awafi a waf afamba awafi ukup pigahafemafi a ukup

---

\* **3:1** Mt 6:33; Kl 2:12; Mk 12:36, 16:19; Ef 1:20    \* **3:2** Ro 6:2; 2 Ko 5:14    \* **3:3** Fl 1:21; 1 Ko 15:43; 1 Jo 3:2    \* **3:4** Ro 6:6,11, 8:13; Ef 4:19, 5:3-6

pigapiga'i anis maefah anis epesi, waf afambai si'i waf sagaila god baso'amunai.

**6** Epes sanda' waf afambai hiafi isimba atis dei' okom wandafunai Godi anaf notaga nogwamaf.

**7** Fowa' ipa' atipa paila waf awafi afambai hiafi pape lafela waf afambai ukup pigahafemafi.\*

**8** Apa' dei' ipa' pendakwaha anef waf awasifi hiafi na'ambaifi. Waf migimigahifi a ukup wandafipi a opalef awalifi ma pigaha anis, a waf basef awafi findiwaifi a basef awasifi alugufi.\*

**9** Ipa' ina pembaso'ma esis sahin owan, owa'i. Dei' main, ipa' apakwaha waf hiafi awafi ma opaf apinai ea', apataga dambaipa. God nanda'epa pataga dambaipa ma opaf namufi.\*

**10** Ea' dondol anen nanda'epa pataga dambaipa atapipa ma pegataga na'amba atin si'i anen nagepe, anen nanda' opaf afamba namufi. Anen nanda'as na'amba ma ipa' pegegawana endilisi.\*

**11** Ea' dei' Krais atona Dembinai nepe nagali'ma epes hiasi hi' alas. Esis Griki Juda a anis owa' Judaisia, esis anoga diga, isimba sagail alupi sogololama waf bu'wafi, agufisi a' agof akasi, waf saga'ifa epes na'ambaisi falafifi atef. Krais atona Dembinai nepe nali'ma epes isimba hiasi hi' alas, nepe nomona epes sasisasi hi' alas.\*

### *Apa' mondofa' waf mugati anis uwahipisafi*

**12** God anen nandandepepa ea' pape amam nematawa ananipai okom maimailipa a'owa'. Ea' ipa' pendanda' waf bu'wafi na'amba. Ipa' pinda'i

---

\* **3:7** Ef 4:25-31, 5:4   \* **3:8** Ef 4:22,25   \* **3:9** Ef 4:24   \* **3:10** Ga 3:28   \* **3:11** 1 Pi 2:9; Ef 4:2,32

epes hiasi uwahipis atapipa petopalopas penda'as andeande'. Ipa' petalogofa ipa' pepe lafela anis daias, penda' waf sa'umbilifi ma esis ea' pepe pititi esis sonda'mepa waffafifafi awafi ipa' ma tol pegape opalef awanelef.\*

<sup>13</sup> I'i anin epen ipe'ini sahoman nenda'man waf awafi, ina a' negwamanaf waf awafi anen nanda'manafi, owa'i. Nenda'an sa'ombeman nekwahomana waf awafi ananifi okom mese'enaf. Dembinai a' nakwaha waf awafi ipe'ifi ea'. Ea' ipa' wapani penda'as na'amba atin.\*

<sup>14</sup> Ipa' penda' waf afambai bu'wafi hiafi ali' aga'ipipafi pindailaf. Ea' penda' anef waf bu'wafi wapani. Ipa' ukup pindaila sahin owan ipe'isi ma waf afamba fakolasepa fanda'epa pagataga atifipai.\*

<sup>15</sup> Krais naso'apa opaf awanafi apa' ea' opaf afamba atof fondomafia nelelemb ipe'ilimbi endilisi. Godnofalepa pataga alop atifipa pegape opalef awanelef. Ipa' pindanifelona dondol.\*

<sup>16</sup> Basef Kraisi fasif a'owa' fendape endilisi opalef ipe'ilifi nomon. Ipa' penda'as na'amba piwalipa esis sahin owan ipe'isi pisindi'amonasa gawa hiani naninani. Ipa' pendanifela Goda opalef ipe'ilifi pendagalaman. Ea' penda' awalef fagail sami ea' penda' awalef lotuwilifi a awalef fegewa' banaga ambagof ipe'igufii.\*

<sup>17</sup> Hiahawes mamahisa ipa' atiasi piga'iasa basefi o penda' maolasi, isimba ipa' pendanda'asa

---

\* **3:12** Ef 4:32, 5:2    \* **3:13** Ro 13:8-10; 1 Ko 13:13; Ef 4:3    \* **3:14**  
Fl 4:7; 1 Ko 12:13,27; Ef 4:4    \* **3:15** Ef 5:19    \* **3:16** 1 Ko 10:31; Ef  
5:20

agol Jisasi. Ama agol ananigil ipa' pendanifela God ahamapa.\*

*Amam nematawa sandaso'amai saloma bataw-isas asasisi*

<sup>18</sup> Ipa' nematawa, ipa' pefe' lafela wauhupipa ipe'imi. Waf afambai dondo'ma ipa' Kristen pinda'afi.\*

<sup>19</sup> Ipa' amam wapani, ipa' ukup pindapindaila wauhiamepa ipe'iwai. Ipa' owa'i penda' opalef awaulifi nimanilifa.\*

<sup>20</sup> Ipa' batawisas wapani, pendame' basef masipai andeande'ma waf a basef asasifi hiafi hi'indalaf. Waf afambai fenda' okom Dembinai bo'om.\*

<sup>21</sup> Ipa' ahapas, owa'i penda' opalef batawisi-pai nimanilif ukup numbutipa. Na'amba ukup asasipi iwanip.\*

*Basefesis agofakasi sanda'maoldowafi saloma esis agufisi*

<sup>22</sup> Ipa' agof akipai pagape lafela anis epes panda' maolasi, pindaila basef ifimba hiafi agufisii. Na'amba penda' maola naep asasipi atip pigai'i'ipas, owa!. Ipa' ombal mehepa ma Dembinai, dei' opalef ipe'ilifi fendaope usi'ilifa maol inimba penda'an andeande'.

<sup>23</sup> Ea' hiahaom mamahoma ipa' pinda'ami, amamba pendanda'am banagambel si'i panda' maola Dembinai atona. Ipa' ina panda' maola epes atis, owa!.

---

\* **3:17** Ef 5:22    \* **3:18** Ef 5:25    \* **3:19** Ef 6:1    \* **3:20** Ef 6:4

\* **3:21** Ef 6:5-8

**24** Dei' main, ipa' pegawa ea', anaf Dembinai no-falo'mepa nese'epa hiahaom fasimi ipa'. Amamba anen nandandepam ea' ma'oh masasa ipa' epes ananipai. Ipa' pape panda' maola Krais, Dembinai ape'inai.\*

**25** Epen mamahina nanda' waf awafii anin anaf nefai' akafimi awami mondahama waf anin nanda'afi. Dei' main, God nawawalogga epes hiasi agufisi agof akasi hi'alasa ikwaf usi'ifi atetef.

## 4

**1** Ipa' agufipai ma esis agof akasi sanda' maoli-pai, ipa' pendanda' waf bu'wafi hilili'ma esis. Ipa' pegawa Dembinai ipe'inai nape otaga ilif.\*

### *Waf sandabeten banagambel sagafe' usi'is hilili'*

**2** Ipa' pendabeten atapipa. Beten ipe'ini, ipa' ukup kilikala' pendape andeande' pendanifela God.\*

**3** Ipa' pendabeten pihali' Goda nogatopalopafa wapani na'amba. Anen nusi'mafa uta afa' ma ogowalapa basef ananifi. Ama ogowalapa basef ifimba Kraisi fowa' fape fandambahi'i. Isimba atis dei' ae' ape kalabus.\*

**4** Ipa' pendandabeten atiasi ae' egawalapa basef ifimba fandambahi'i fegataga alihif si'i okom Godi na'i ae' enda'am.\*

**5** Esis sagape ando'a Kraisi, ipa' nomonas sondape andeande'ma fe' ipe'ini. Nimaguf mamahifa

---

\* **3:24** Ro 2:11   \* **4:1** Ef 6:18, Fl 4:6; Lev 25:43,53; Ef 6:9   \* **4:2**  
Ro 15:30; Ef 6:19; 1 Ko 16:9   \* **4:3** Ef 6:20   \* **4:4** Ef 5:15-16; 1 Te  
4:11-12

ufia'w kwogala ipa' piga'ipasa basef Kraisi, dao' pinda'ipasef.\*

<sup>6</sup> Basef ipe'ifi dondol fenda taga usihif fasifa pegawa basefa epes hiasi hi'igalas dondo'ma hiahawes mais ukup asasipi pandanda'masi.\*

*Pol nasapa' Tikikus naloma Onesimus mafe'ma esis*

<sup>7</sup> Tikikus anen sahomapa ape'inai endilisi ae' okom magamagailanai nanda' maol Dembinai datimai ae' alomana wandao'oma wanda'ani. Anen atiasi nefe'mago ipa' nowalapa basef ni'ipipaefa ae' dei' ape a'imama.\*

<sup>8</sup> Ae' asapa'ana nafe'mago ipa' ma pegegawa afa' wape wa'imama ma nogowa' banaga opalef ipe'ilifi.\*

<sup>9</sup> Anen no'wa Onesimus mefe'mago ipa', anen owamapa nagahapifanai afa' ukup pagapagailanai nanda' maol Godi datimai. Anen nepe mini'ap ipe'ipi. Atiasi amom biam mil'ipipago hiahawes hiasi sagataga na'ai.\*

*Pol nasapa'i dagala ma nemaf bu'wafi ma esis*

*Kolosi*

<sup>10</sup> Aristarkus anen nanda' kalabus nalome, anen wapani na'iago nemaf fasifi ma ipa'. Ea' Mak wapani, nandataga Barnabasi, nanda'mepago nemaf fasifi ma ipa' wapani. I'i nogatagama ipa' ma, dao' ipa' okwanago si'i ae' aga'ipipago ea'.

<sup>11</sup> Ea' Jisas agol wa'agol Justus, anen wapani nanda'mepago nemaf bu'wafi ipa'. Ama mini'ap

\* **4:5** Ef 4:29; 1 Pi 3:15   \* **4:6** Ef 6:21   \* **4:7** Ef 6:22   \* **4:8** Fm

10-12   \* **4:9** Ap 19:29, 12:12; Ap 13:13; Fm 24

Judai, amom atom manda' maol malome ma wigihimba'ma hiasi sogawis nomona maol Godi nope Dembinai nugumafias. Amom matopalope ma maol inimba.\*

<sup>12</sup> Epafras anen nandagala nanda'mepago nemaf bu'wafi ipa'. Anen wapani mini'ap ipe'ipi, nanda' maol Krais Jisasi nogape lafelanai. Dondol nandabeten banagambela ipa'. Anen nandabeten God nonda' ipa' pigalutu banagepa si'i epes dembipai pegegawa God andeande'i ma pi-hapifif tatala'if pegaila okom Godi atapipa.

<sup>13</sup> Ae' atowe egawa anen, na'amba dei' awalapana a'l'i anen nanda' maol numa'uni endilisi ma nagatopalopa ipa' paloma esis amam nematawa walemb ambalemb bialemb Laodisiai Hierapolis.

<sup>14</sup> Luk dokta open ape'inai ukup pagapagailanai, anen naloma Demas amom manda'ago nemaf bu'wafi ma ipa'.

<sup>15</sup> Ipa' pese'aso dagala ma nemaf bu'wafi ae'afi ma esis alipisi sagape Laodisiai. Ea' penda'masago nemaf bu'wafi ma Nimfa kolomago esis Kristen sios sandakolas ipat ako'utai.

<sup>16</sup> Ipa' pitalifa basef ifi'i ma ea' pesapa'ef fefe'mago esis Kristen sios sagape Laodisiai, ma esis wapani sitilif soga'if. Ea' basef ifimba ae' asapa'ef fagafe' ma esis Laodisiai, wapani, ifimba ipa' pitilif pi'if.\*

<sup>17</sup> Ea' ipa' pi'ipago Arkipus na'amba pi'i, "Ina' nimafi maol inimba negefa'an ea' ma Dembinai

---

\* <sup>4:11</sup> Kl 1:7; 2 Ti 4:10-11; Fm 24 \* <sup>4:16</sup> Fm 2

andeande' nimbifan."\*

<sup>18</sup> Dei' ae' Pol ahapila pen lagol ae'agili atogol anda'mepago basef ifimba bandafi atif. Dei' anda'mepago nemaf bu'wafi ipa' hipai. Ipa' ukup pendanda'pendapoma ae' amom mowa'e sen ata' ape kalabus atapiwi. Ae' a'i okom lu'unai Godi notopalopago ipa' dowaf numafipago nope nolomago ipa'. Ea' ma'uf.

---

\* **4:17** 1 Ko 16:21

**Basef Bu'wafi Godi  
The New Testament in the Mufian Language  
Nupela Testamen long tokples Mufian long Niugini**  
copyright © 1998 Wycliffe Bible Translators, Inc.

Language: Mufian

Dialect: Mufian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

---

PDF generated using Haiola and XeLaTeX on 25 Aug 2024 from source files  
dated 31 Aug 2023

b0cff915-4005-598f-9bbc-38b1e35d47b1